

四庫全書

子部

欽定四庫全書

唐開元占經卷五十一

唐 瞿曇悉達 撰

太白占七

太白犯石氏中宮

太白犯攝提一

聖洽符曰太白入犯攝提兵起滿野強臣謀主若守衛
臣有謀期二年

太白犯大角二

郝萌曰太白守大角兵大用有國亡 荊州占曰太白
守大角兵大動 文曜鉤曰太白守犯大角天下亂大
兵起強臣謀主若貴人被戮期一年 海中占曰太白
犯守大角臣謀主有兵起人主憂王者戒慎左右期不
出百八十日遠一年

太白犯梗河三

巫咸曰太白犯守梗河國有謀兵四夷兵起來侵中國

邊境有憂

太白犯招搖四

聖洽符曰太白犯招搖邊兵大起敵人為寇若守之敵
兵敗若其王死期不出三年 荊州占曰太白守招搖
旗幟起 甘氏曰太白入守招搖天下兵大起非一國
遠夷為亂欲侵中國人主有憂期一年

太白犯玄戈五

聖洽符曰太白犯守玄戈為邊兵大起敵人為寇若守

之敵人敗若其王死期不出二年

太白犯天槍六

巫咸曰太白犯守天槍邊兵起槍大用防戍有憂若誅邊臣期不出年

太白犯天棓七

巫咸曰太白犯守天棓邊夷起機棓大用防戍有憂若誅邊臣期不出年

太白犯女妝八

荊州占曰太白犯女牀凶若守女牀宮有變害若被誅
甘氏曰太白守犯女牀兵起宮中若后有誅期百八
十日遠一年

太白犯七公九

石氏曰太白犯七公羣臣有誅 黃帝占曰太白守七
公為飢君不安 石氏曰太白犯守七公輔臣有誅議
臣相疑若有誅者人主有憂 甘氏曰太白犯守七公
兵革大起大臣有誅若有戮死者期不出年

太白犯貫索十

巫咸曰太白犯守貫索天下亂兵起多有獄事貴人有死者 石氏曰太白入貫索中犯秉守以獄為亂 玄冥占曰太白犯守天牢以獄起兵大人憂

太白犯天紀十一

荊州占曰太白守天紀有兵亂 石氏曰太白守天紀幸臣執權有兵起王者有憂若犯守大臣為亂兵起宮中若有大旱之災人民大飢

太白犯織女十二

巫咸曰太白守織女后有誅者 黃帝占曰太白犯守織女天下有女憂有兵起不出其年

太白犯天市垣十三

海中占曰太白入天市國有謀兵將相有戮死者期百八十日 郝萌曰太白入天市中五官有憂一曰將有憂一曰大臣戮若糴貴 文曜鉤曰太白入居守天市中驚國有謀兵鈇鉞用兵大起期不出三年 巫咸曰

太白入天市而守之相坐之有兵起貴人有憂若誅期二年 郝萌曰太白入若守天市諸侯貴人必有戮者一曰更幣

太白犯帝座十四

海中占曰太白犯帝座大臣為亂強臣謀主有兵期不出年 石氏曰太白守犯帝座有逆亂事

太白犯候星十五

石氏曰太白犯守候星諸侯起兵有千里之行政令急

民多苦 海中占曰太白犯守候星陰陽不和五穀傷
人民大飢有兵起

太白犯宦者十六

石氏曰太白守宦者凶 甘氏曰太白犯宦者左右輔
臣有謀若戮死期不出年

太白犯斗星十七

石氏曰太白守斗星者凶

太白犯宗正十八

石氏曰太白守宗正左右羣臣多死者若更政令人主有憂

太白犯宗人十九

石氏曰太白犯宗人親族貴人憂若有死者一曰主親有離絕

太白犯宗星二十

甘氏曰太白犯守宗星宗室之臣有分離者 玄冥占曰太白觸抵宗星幸臣有誅者期二年

太白犯東西咸二十一

石氏曰太白守東西咸女主憂誅若貴女有戮死期二年
荊州占曰太白守東西咸憂兵起 石氏曰太白
守犯東西咸者為臣不從令有陰私

太白犯天江二十二

陳卓曰太白守天江洪水為害不出其年 巫氏曰太

白犯守天江天下有水若入之水齊城郭人飢亡去其

鄉

宋書天文志曰晉穆帝永和十一年八月己未太白犯天江占曰河津不通昇平元年慕容儁遂據臨漳

有幽并青冀之地緣河諸將漸奔散津河隔絕矣

太白犯建星二十三

陳卓曰太白犯建星大臣相譖 郝萌曰太白入建星外國使來見主出建星主遣使至國期皆三十日 黃帝占曰太白守建星滿二十日必大赦 巫咸曰太白入建星若守之兵起闕道不通若有外國使來者期一年

太白犯天弁二十四

甘氏曰太白犯天弁若守之則囚徒兵起一曰五穀不成糴大貴人民飢

太白犯河鼓二十五

黃帝占曰太白犯河鼓大將若左右將有誅者若有罪以五色占之 石氏曰太白入河鼓兵大起大將出若守之所犯之將誅期二年 郝萌曰太白守河鼓兵起期六十日

太白犯離珠二十六

石氏曰太白犯離珠宮中有事若有亂宮者宮人有罪黜者 巫咸曰太白犯離珠有兵起後宮凶女主有憂

太白犯匏瓜二十七

玄冥占曰太白守匏瓜人主誅邑族若有兵一曰王者以策賜諸侯 聖洽符曰太白犯守匏瓜天下有憂若有遊兵名策貴一曰魚鹽貴價十倍不出其年

太白犯天津二十八

海中占曰太白犯天津關道絕不通有兵起若關吏憂

文曜鉤曰太白入天津兵起大亂以其所近四方中
央死而葬易政立王 齊伯曰太白守天津兵起有亡
國期一年遠二年 石氏曰太白有赤芒而守天津三
十日關道不度人主有憂若諸侯

太白犯騰蛇二十九

甘氏曰太白守騰蛇天子前駟凶奸臣有謀前駟為害
玄冥占曰太白守騰蛇諸侯若先駟者一曰以水為
災水物不成

太白犯王良三十

帝覽嬉曰太白入王良人主以車為弊馬多死關津不通國有憂 石氏曰太白守王良為兵 海中占曰太白守王良三十日大將亡一日主將皆大亡兵起車騎行期百八十日遠一年 郝萌曰太白守天馬天子馬多死者 齊伯曰太白犯守王良天下有兵諸侯相恐 强臣謀主期不出年

太白犯閣道三十一

石氏曰太白守閣道而絕漢者為九州異政各主其王
天下有兵期二年 齊伯曰太白守閣道天子禦難御
道塞臣謀君一曰宮人有謀戒慎女兵

太白犯附路三十二

石氏曰太白守附路太僕有罪若有誅一曰馬多死道
無乘馬者

太白犯天將軍三十三

郝萌曰太白入將軍興軍吉 荊州占曰太白乘犯天

將軍將軍以兵事誅又曰太白守天將軍兵大起將軍行文曜鈞曰太白入守天將軍大將有憂若兵起一曰以飢為敗人民憂石氏曰太白犯守天將軍為大將誅若有死者

太白犯大陵三十四

石氏曰太白入大陵國有大喪大臣有誅若戮死人民死者大半皆不出其年荊州占曰太白乘大陵天下盡大喪死人如岳甘氏曰太白犯守大陵其國有喪

大人憂若有土功墳陵之事期百八十日

太白犯天船三十五

郝萌曰太白守天船大人當之天下赦 聖洽符曰太白入守天船兵起舟船用有亡國期不出年 海中占曰太白入守天船國有喪貴臣有戮期二年

太白犯卷舌三十六

海中占曰太白犯卷舌有奸亂之變若入之臣有妄言於君者若讒臣謀君以口舌起兵而亂國者期百二十

日若一年 石氏曰太白乘卷舌天下多喪若入之有
佞臣謀其君以口舌為害人主有憂

太白犯五車三十七

石氏曰太白犯五車大旱若有喪兵起車騎行五穀不
成天下民飢君絕糧犯倉星穀貴若有水一云若入而
中犯乘庫星兵起北方若西北方 郝萌曰太白入五
車留不去秦國金玉貴一曰兵大起百萬人以上八日
占其國 荊州占曰太白入五車天庫天下大兵起

文曜鉤曰太白入經五車四猾起 百二十占曰太白
入五車若犯天潢有大水五穀不成糴大貴期不出年
郝萌曰太白入五車留不去即有兵春見若舍其西
北多死人馬牛多疾疫在酒泉燉煌方舍東北糴石五
百 黃帝占曰太白守五車四夷人相食三歲不復其
亂 郝萌曰太白守五車有大兵不出九十日而至矣
黃帝占曰太白乘守天庫四夷兵起必有死王 郝
萌曰太白乘守天庫中國兵所向無不服有自來之將

其民入中國國有大喜

太白犯天關三十八

荊州占曰太白出入天關萬人多死 石氏曰太白行

天關中每至柳楊當去不去徘徊亂行光色隆怒見其

妖祥中國隔絕道路不通 河圖曰太白提天關關梁

所出入貴人多死

海中占曰地氣泄生相害萬物大傷

海中占曰太白

守天關二十日大赦一云臣誅主歲水一曰守之二十

日兵甲鏘鏘以水行 郝萌曰太白守天關大臣反

宋書

天文志曰晉簡文咸安二年五月丁未太白犯天關占曰兵起六月庚午入康城

一曰為地

氣泄貴人多死 西官候曰太白守天關兵大起關道不通人民相恐 海中占曰太白守犯天關道絕天下相疑有關梁之令 郝萌曰太白行不從天關不出其年有兵

太白犯南北河三十九

黃帝占曰太白乘南河戍者出南河為中國兵起 石氏曰太白行南河戍中若留止為西方兵起百姓疾

郝萌曰太白舍河戍三十日國有男喪 黃帝占曰太

白舍南河戍間天下難起道不通 石氏曰太白守南

河戍蠻夷兵起邊戍有憂若有旱災人民飢 海中占

曰太白守南河戍邊臣有謀

郝萌曰有奸謀也

若諸侯兵起

君憂若敗亡 黃帝占曰太白留止守南河戍為百姓

病若行其中或留止守之為旱有喪 郝萌曰太白行

南河戍若留止守之為有喪在北河戍下中國有兵所

向者勝 黃帝占曰太白乘北河戍若出北河北皆為

胡王死若留北河戍下三十日必有自來主將其民降
中國其留過三十日四夷大亂太白從南來南方當之
從北方來北方當之 郝萌曰太白舍北河戍三十日
有女喪 甘氏曰太白守北河戍邊戍有謀若有兵起
關梁不通人主有憂期一年 郝萌曰太白守北河戍
有內謀一曰有白衣之會又曰四夷相伐 荊州占曰
太白留止守北河中兵起道不通 玄冥占曰太白守
北河戍胡夷兵動若守之三十日不下胡人敗若胡王

死天下大水人民飢期不出年若二年 石氏曰太白
入北河戍中而留止不出百日天下兵悉起兵戰秋冬
臨衝革也春夏德也 郝萌曰太白經南河戍之南刑
法峻暴誅伐不當經北河戍之北女子金錢貪色奢佞
失治道皆期三年中期六年遠期九年而災至居南北
河戍中若守之百日兵大起 荊州占曰太白守兩河
間天下乖離道路不通若在陽門中天下並戰 郝萌
曰太白在陽門中旱入天高中有奇令若失度守陰門

若陽門為諸侯奸入天高成勾已天下有憂 黃帝占
曰太白留守陰門不出百日天下兵悉起若以四月從
東方來入天高留三十日天下民受賜留五十日兵起
宮中 邠萌曰太白不行天門天關為國有喪太白與
熒惑俱在帝闕中則有大事分國

太白犯五諸侯四十

石氏曰太白犯五諸侯若守之兵大起將士出諸侯有

憂若有死

宋書天文志曰晉安帝義熙六年三月太白犯五諸侯是年三月始興太守徐道覆反江

州刺史何無忌討之大敗於豫章無忌死之四月盧循寇湘中攻巴陵五月循等大破豫州刺史劉敬宣僅以身免八年六月臨川烈武王道規薨時為豫州九月兖州刺史劉蕃伏誅

巫咸曰太白犯

五諸侯有兵起大將出若大臣有誅若有戮死如入五諸侯伺其出日而數之期二十日兵發伺始入日而處之率一日為十日而軍罷 文曜鈞曰太白守五諸侯四猶起兵官亂 荊州占曰太白守五諸侯兵起 郝萌曰太白犯秉守五諸侯為所中死秉守者誅若有殃期三年兵發 石氏曰太白中犯秉守五諸侯諸侯兵

死期三年

太白犯積水四十一

巫咸曰太白犯守積水其國有水災水物不成魚鹽貴
一曰以水為敗糴大貴人民飢期二年

太白犯積薪四十二

甘氏曰太白犯守積薪天下大旱五穀不登人民飢亡

太白犯水位四十三

石氏曰太白犯守水位天下以水為害津關不通一曰

大水入城郭傷人民期不出二年

太白犯軒轅四十四

荊州占曰太白犯軒轅女御天子僕死 文曜鉤曰太白入軒轅四猾起 石氏曰太白入軒轅中犯乘之有逆賊若火災 黃帝占曰太白出東陵必有白龍出左右宮若行軒轅中犯女主女主失勢憂喪也列大夫有放逐者五官有不治者色悴為憂為疾其所中犯乘守者誅若有罪 荊州占曰太白行軒轅端貫出其中而

東大臣出令 石氏曰太白在軒轅中有以女請人君

者 黃帝占曰太白中女主女主當之其守犯女主女

主有憂

宋書天文志曰魏青龍四年七月七日甲寅太白犯軒轅大星景初元年皇后毛氏崩 晉成

帝咸康六年六月七日太白犯軒轅大星七年三月皇后杜氏崩 安帝義熙六年八月壬午太白犯軒轅大

星七年八月皇后王氏崩宋文帝元嘉十六年八月朔日犯軒轅明年皇后袁氏崩 聖洽符曰

太白守軒轅兵大起憂宮中若有女喪各以其所犯占

之期一年 帝覽嬉曰太白守軒轅大星若環繞之皇

后有急若憂誅一曰天下易王女主有殃 荊州占曰

太白守軒轅女御有誅者 巫咸曰太白行犯守軒轅

女主失政若失勢一曰大臣當之若有黜者期二年

司馬

彪天文志曰光武建武九年七月乙卯金星犯軒轅大星十月己丑又犯之軒轅者後宮之官大星者後宮之皇后金犯之為失勢是時郭后已失勢見踈後廢為中山太后 孝和元年四月乙酉金星犯軒轅東北二尺四年竇氏被誅太后失勢 孝桓永壽二年八月戊午太白犯軒轅大星為皇后後二年四月懿獻后以憂死

荊州占曰太白中犯守軒轅左角為大臣當之

太白犯少微四十五

石氏曰太白入少微君當求賢佐不求賢佐則失奪勢

太白犯守少微名士有憂王者任用小人忠臣被害
有死者 黃帝占曰太白入中犯秉少微為宰相易女
主有憂 石氏曰太白入中犯秉守少微為五官亂宰
相憂

太白犯太微四十六

春秋緯曰太白犯太微主受期命奪號滅衝為期

宋書天文

志曰晉愍帝建武元年六月丁卯太白犯太微占曰王者惡之七月愍帝崩于寇廷也

帝覽嬉

曰太白行犯太微左右執法為大臣有憂

司馬彪天文志曰孝安元

初元年閏月己未太白犯太微左執法建光元年五月太后兄車騎將軍隲等七侯皆免官自殺宋書天文志曰晉成帝咸康四年九月太白犯左執法五年七月庚申丞相王導薨安帝義熙六年九月甲寅太白犯左執法八年九月兗州刺史劉蕃尚書僕射謝琨伏誅也

石氏曰太白入太微

庭所中犯秉守者為天子所誅若有罪太白犯左右

執法左右執法者誅若有罪郝萌曰太白犯天府庭

臣為亂荊州占曰太白道從太微西蕃北南方星間

入到南蕃東方星間南出道也中西蕃直坐入者非道

也太白以庚子日順入太微天庭中天子所使也不

以庚子曰非天子使 太白入太微軌道吉軌道者入
西門出東門若左右掖門行不留也不軌道者謂有所
犯守也 郗萌曰太白當太微門為受制當在左執法
受事左右執法守太微門三日以下為受制三日以上
為兵為賊為亂為飢 石氏曰太白出東掖門為相受
命東南出德事也出西掖門為將受命西南出刑事也
期以春夏 太白入太微出左掖門大將軍出東南伐
出右掖門大將軍出西南伐皆不出其年 黃帝占曰

太白入天庭色白潤澤為期百八十日有赦 帝覽嬉
曰太白入太微而出端門臣不臣 雜書曰太白入左
右掖門出太陽東門強臣暴誅若入端門庭守十日臣
欲害君期不十日 春秋圖曰太白入西華門出東華
門大臣作亂謀其主若諸侯不從王命期百八十日若
一年 石氏曰太白入太微庭中華東門若左掖門
而南出端門者為必有反臣 太白入西出東門皆為人
君不安欲求賢佐有入中西華門出中華東門為臣有

不令有入太陰西門出太陰東門皆為天下大亂有喪

若大水 甘氏曰太白入太陰西門出東門天下大亂

主死破宮若有大水期一年

司馬彪天文志曰王莽地皇四年秋太白在太微中

燭地如月光太白為兵太微為天庭太白贏而北入太微是兵將入天子庭也是時王莽遣二公之兵至昆陽已為光武所破莽又拜九人為將軍至華陰皆為漢將劉畢李崧所破進攻京師十月戊申漢兵自宣平城門入二月己酉城中少年子弟數千人起兵攻莽商人杜昊殺莽漸臺之上校尉公賓斬莽首大兵蹈公庭之中仍以更始入長安居前

郝萌曰太白入太微西門犯

天庭出端門為大臣伐主入西門而折出右掖門為大

臣假主之威而不從主命太白入西華門出端門東門
詐稱詔 太白入太微西門若入端門出東門為貴者
奪勢 太白入太微中臣相殺國有憂 荊州占曰太
白主西方北方入太微西南陽星之南為西方入二星
之北為北方皆臣殺主之候也犯帝座星臣勝不犯不
勝視其所止留之宿國以知其所誅 荊州占曰太白
入太微西蕃第一星行至東蕃第一星東下去太微者
天子之庭也太白行其中宮門當閉大將軍被甲守兵

大臣伏誅左右有罪者

司馬彪天文志曰孝靈帝建寧元年六月太白在西方入太微

犯西蕃南頭星其年八月太傅陳蕃大將軍竇武謀欲盡誅諸宦者其年九月辛亥中常侍曹節長樂五官吏

朱瑀覺之先矯制殺

蕃等家屬徙日南

荊州占曰太白入太微宮為天

下驚一曰有兵 太白入天庭國不安其宮 太白入

太微中近臣起兵入庭中丞相御史誅 北官侯曰太

白入太微天庭天子自將兵大臣謀立若有誅者 黃

帝占曰太白東行入太微庭中出東門天下有急兵若

守將相丞相御史大臣有死者若入端門守庭大禍至

入南門出東門國大旱入南門逆行出西門國有大水
逆入東門出西門大國破亡若順入西蕃而留不去楚
國凶殃 巫咸曰太白逆行入太陽東門出西門有反
臣欲伐其主期九十日 太白逆行入太微天庭中為
大臣有誅若諸侯戮死期二年 石氏曰太白逆行入
左掖門為臣劫其主 太白逆行於太微之中及出左
右掖門為有逆謀天子有命將征伐之事一曰大赦可
以解其患 荊州占曰太白逆行入太微天庭中為諸

侯將有殺者若至黃帝座而謀成不至黃帝座而還有

謀不成以其入日占國 玉歷曰太白逆行入太微強

臣凌主天下大亂諸侯皆兵起 太白留太微庭中天

下大憂中央留十日以上為天下亡徒為兵者 太白

道南蕃入留止南門為大臣有憂

司馬彪天文志曰太白羸而北入太微大

兵將入天子之庭出太微宮中有兵

荊州占曰太白從右入七日以上

為主有憂 感精符曰太白入端門而守之大臣謀叛

將軍伐主外臣陵內天下大亂期二年 黃帝占曰太

白干太微留守二十日以上為必有兵革天下大赦

春秋緯曰太白入太微庭其陵犯留焉三十日必有喪

荊州占曰太白入太微天庭中犯秉守者殺若有罪

各以守宦名名之

宋書天文志曰晉惠帝大安二年秋太白守太微成都河間攻洛陽三年

正月東海王越執長沙王又張方又殺之

太白食若中犯秉守太微東西

蕃四輔為君失禮輔臣有誅者

太白犯黃帝座四十七

石氏曰太白犯黃帝座改政易主天下亂存亡半 雒

書罪級曰太白入黃帝座強臣殺主 荊州占曰太白入黃帝座其色白者為有赦 太白入太微宮中至黃帝座有兵在中 郝萌曰太白抵黃帝座為有土功事 荊州占曰太白觸黃帝座君死 黃帝占曰太白守黃帝座為大人憂 海中占曰太白守端門若至帝座星南禍小若犯黃帝座臣弑主天下大亂不出年

太白犯四帝座四十八

石氏曰太白犯四帝座臣謀主去之一尺事不成 甘

氏曰太白中犯乘守四帝座天下亡 玉歷曰太白犯
四帝座臣謀主若被誅 石氏曰太白中犯乘守四帝
座辟君憂也

太白犯屏星四十九

郝萌曰太白入太微宮中至屏而留為有兵在中 甘
氏曰太白犯守屏星君臣失禮下而謀上一曰大臣有
戮死者 石氏曰太白犯乘守屏星君臣失禮而輔臣
有誅者若免罷去

太白犯郎位五十

甘氏曰太白犯守郎位輔臣有誅左右宿衛為亂王者有備

太白犯郎將五十一

巫咸曰太白犯守郎將命曰陵陵則將有誅者將憂
荊州占曰太白犯乘牛郎將有以符節奸者一曰必有
不還使 太白中犯乘守郎將名曰陵節郎誅一曰大
臣為亂誠左右

太白犯常陳五十二

甘氏曰太白犯常陳守衛有謀兵起宮中天子自出行
誅期百八十日遠一年

太白犯三台五十三

玉歷曰太白入犯上台司命近臣有罰若有誅一日近
臣有逃走者以五色占色黃白當無故青黑憂死期一
年 文曜鉤曰太白犯守中台司中奸臣有誅若有誅
者中公當之 巫咸曰太白犯守下台司祿近臣有罪

若出走色黑者死 郝萌曰太白犯守上台大尉自將
兵在宮中大戰交刃流血滂沱貴人多死期在七月守
中台司徒反守下台司空反 荊州占曰太白守三台
天下驅掠兵聚一隅 太白舍天柱下地大動民恐臣
以謀主 石氏曰太白擊天柱地大動兵大起

太白犯相星五十四

石氏曰太白犯相星輔臣凶 太白守相星三十日大
臣為亂天下兵起人主有憂

太白犯太陽守五十五

石氏曰太白犯太陽守執御臣憂內將軍有死者期九十日
甘氏曰太白犯守太陽守大臣戮死若有誅期
不出年

太白犯天牢五十六

石氏曰太白犯天牢王者以獄為弊貴人多有斬者一
曰若有赦期不出百八十日太白入天牢犯守者以獄
為亂

太白犯文昌宮五十七

石氏曰太白入文昌天下兵起其君不安若有走主
春秋緯曰太白入文昌三軍反兵滿都以弱亡

太白入北斗五十八

玄冥占曰太白入北斗魁中強臣奪主位天子棄宮走
天下大亂更政易王期不出三年 甄曜度曰太白守
北斗人主御守兵罷國亂一曰執政令吏憂以五色占
之 石氏曰太白入守北斗執政大臣有憂若被誅

郝萌曰太白入守北斗貴人有擊者

太白犯紫微宮五十九

巫咸曰太白守紫微宮民莫處其室宅流移去其鄉

太白犯北極鉤陳六十

聖洽符曰太白入紫微宮中犯北極臣害其主天下大亂兵走四塞易主期百八十日遠一年 黃帝占曰太白犯守北極主星有大喪大臣有誅若抵之兵喪並起 文曜鉤曰太白犯守太子庶子星各以所守有罪若

死 荊州占曰太白犯乘守北極主星者為大人憂一
曰有喪一曰為有反者 太白三月舍樞星下芒赤色
怒兵起 黃帝占曰太白犯守鈎陳後宮亂兵起宮中
幸臣謀主有憂

太白犯天一六十一

石氏曰太白犯天一幸臣有謀兵起人主憂

太白犯太一六十二

石氏曰太白犯太一幸臣有謀有兵起人主有憂



唐開元占經卷五十一

欽定四庫全書

子部

唐開元占經卷五十二至
七

詳校官中書_臣李采

靈臺郎_臣倪廷梅覆勘

總校官編修_臣王燕緒

校對官庶吉士_臣潘曾起

謄錄監生_臣朱連傑

欽定四庫全書

唐開元占經卷五十二

唐 瞿曇悉達 撰

太白占八

太白犯石氏外官一

太白犯庫樓一

郝萌曰太白入庫樓三日兵起尤甚一日兵起西北方
若舍之三十日諸侯兵悉發大將出 王厯曰太白守

庫樓兵起將軍出車騎徧野

太白犯南門二

石氏曰太白犯守南門邊夷兵起若道路不通

太白犯平星三

石氏曰太白犯平星凶 文曜鉤曰太白歷平星主命

傾 甘氏曰太白守平星執政臣憂若有罪誅期一年

太白犯騎官四

甘氏曰太白犯守騎官有兵起馬多發若多死 石氏

曰太白入騎官若守之兵大起車騎用將軍出若騎士憂 郝萌曰太白入守騎官不出二十日赦天下

太白犯積卒五

石氏曰太白入積卒若守之兵大起士卒大行若多死期二年 玄冥占曰太白犯守積卒主失位天下亂兵大起期百二十日

太白犯鼈星六

黃帝占曰太白守鼈星為有白衣之會 巫咸曰太白

犯守鬘星天下有水旱之災守陽則旱守陰則水

太白犯九坎七

石氏曰太白守九坎天下旱名水不流五穀不登人民大飢一曰之陽大旱之陰有水又曰犯守九坎凶

太白犯敗白八

石氏曰太白守敗白民不安其室失其釜甑若流移去其鄉

太白犯羽林九

郝萌曰太白入羽林有反臣中兵也

宋書天文志曰宋明帝泰始元年十

二月己巳太白入羽林占曰兵動明年羽林兵出誅太宰江夏王義恭尚書令柳元景僕射顏師伯等明年會稽太守尋陽王子房廣州刺史袁曇遠雍州刺史袁顗青州刺史沈文秀並反

太白經過羽

林中天子為軍自守 黃帝占曰太白守羽林兵起期

六十日 石氏曰太白守羽林為有馬行期三十日

甄曜度曰太白入守羽林兵大起大將軍出行臣謀其

主若有喪期二年 海中占曰太白入守羽林有兵起

若逆行變色成勾已天下大兵關梁不通不出其年

荊州占曰太白入天軍大將軍在外 石氏曰太白入
天軍中為兵起一曰入天軍留守若變色逆行成勾已
為兵起急 郝萌占曰太白犯天軍為兵起有破軍死
將 太白入天壘天下有兵期二十日若百二十日
石氏曰太白入守壘壁陣天下兵起左右倖臣為亂期
四十日若百二十日

太白犯北落十

石氏曰太白入守北落亦為兵大合軍門 海中占曰

太白守北落天下有兵夷狄入塞來侵中國將士出

石氏曰太白與北落相貫抵觸有光芒相及為兵戰覆
軍殺將伏尸流血不可當也期百八十日若一年

太白犯土司空十一

聖洽符曰太白守土司空邦君有死者海中占曰太

白守土司空其國以土起兵若有土功之事天下旱

石氏曰太白守土司空有兵喪天下憂水

太白犯天倉十二

黃帝占曰太白入天倉中主財寶出主憂臣在內天下有兵而倉庫之戶俱開主人勝客事不成期二十日而發 荊州占曰太白守天倉天下飢粟出 齊伯曰太白守天倉諸侯有發粟之事有兵起星若當戶守之將受命不為主用 石氏曰太白入守天倉有兵起食粟散出一日年穀不登人民飢 郝萌曰太白中犯乘守天倉四夷人相食期三歲兵起西方若北方

太白犯天囷十三

石氏曰太白入天囷天下兵起囷倉儲積之物發用一

曰御物多有出者庫藏空虛期二年海中占曰太白

入天囷天下兵起諸侯謀囷倉庫藏有破者

宋書天文志曰晉孝

武大元二年四月壬申太白入天囷占曰為飢隆安元年王恭舉兵脅朝廷內外戒嚴出國寶以謝之又水旱

飢民

太白犯天廩十四

石氏曰太白守天廩天下大飢甘氏曰太白入守天

廩天下有兵歲大飢倉粟散不出其年玉歷曰太白

入守天廩兵起滿野天下粟出給軍糧一曰糴貴石氏曰太白犯守天廩天下亂粟散出

太白犯天苑十五

荊州占曰太白入天苑出兵犯外夷 荊州占曰太白守天苑兵起馬死 石氏曰太白入守天苑牛羊禽獸

多疾疫若守之二十日天下兵起馬多死其國憂

漢班固天

文志曰漢孝武元鼎五年太白入天苑占曰將以馬起兵也一曰馬將以軍而死耗其後以天馬故誅大宛馬大死 於軍 玄冥占曰太白入守天苑邊境兵起王者出兵

征外夷天下馬發

太白犯參旗十六

文曜鉤曰太白守參旗九州騷動天下皆兵弓不下弦
矢不舍筭其國不寧王者有憂 海中占曰太白守參
旗兵大起弓弩用將士出行一曰弓矢貴

太白犯玉井十七

黃帝占曰太白入玉井為強國失地其出之強國得地
巫咸曰太白入玉井國有水憂若以水為敗水物為

不成期不出年 感精符曰太白入守玉井水兵大起
若以水為變魚鹽十倍

太白犯屏星十八

甘氏曰太白入屏星為大臣戮若疾 玄冥占曰太白
入守屏星諸侯有謀若大臣有戮死者

太白犯天廁十九

黃帝占曰太白守天廁為大臣戮者 郝萌曰太白守
廁星國多疾疫兵飢並起人主有憂 甄曜度曰太白

入守天厠天下大飢人相食死者大半期二年

太白犯天矢二十

帝覽嬉曰太白守天矢貴人多有疾而病死者一日民多以飢死

太白犯軍市二十一

荊州占曰太白守軍市以飢兵起 石氏曰太白入守軍市兵大起大將軍出若以飢兵起一日天下亂四夷兵起道路不通一日大軍飢絕其糧兵士逃亡期二年

太白犯野雞二十二

甘氏曰太白入軍市犯守野雞其國凶有死將軍營敗
兵士散

太白犯狼星二十三

感精符曰太白守狼星車騎出滿野守二十日將相有
死者 石氏曰太白守狼星野獸死 郝萌曰太白提
狼星而出入守之車騎兵出大將有千里之行 荊州
占曰太白守狼敵兵起 太白犯守狼星大將出行其

國有兵一曰有兵將死 齊伯曰太白犯守狼星兵大

起士卒行天下凶諸侯相攻多賊盜

宋書天文志曰晉惠帝永興二年四

月丙子太白犯狼星是年荀晞破公師藩張方破莊陽王虢關西諸將攻河間王顥顥奔走東海王遂而殺之也

太白犯弧星二十四

荊州占曰太白守弧星弓弩矢貴大將軍有千里之行
民多死者 玄冥占曰太白守弧星臣有謀主者庫兵
盡用關梁四塞津道不通期二年

太白犯稷星二十五

海中占曰太白犯天稷有旱災五穀不登歲大飢五穀散出

太白犯甘氏中官二

太白犯四輔一

荊州占曰太白犯乘守四輔星君臣失禮輔臣有誅者

太白犯天厨二

荊州占曰太白犯天厨大官事誅石氏曰太白守天厨大官吏死

太白犯鼓旗三

石氏曰太白守鼓旗兵革起

太白犯天田四

文曜鉤曰發大兵相殘賊則太白入天田 荊州占曰

太白守天田五穀傷

太白犯天門五

荊州占曰太白舍天門中人主無出邦門之遠宮廊廣

門大有伏兵

太白犯平道六

甘氏曰太白入守平道天下兵亂

太白犯酒旗七

文曜鉤曰太白犯酒旗三公九卿謀 荊州占曰太白
守酒旗天下大酺有酒肉財物若爵宗室

太白犯天高八

黃帝曰太白以四月從東方來入天高留三十日民受
賜留五十日兵起宮中 郝萌曰太白入天高成勾已

天下有憂 太白舍天高中有奇令

太白犯礪石九

荊州占曰太白守礪石兵起以入日占國

太白犯積尸十

石氏曰太白守積尸大人當之

太白犯天潢十一

黃帝曰太白入天潢中天下大亂易政一曰貴人死又
曰兵起軍起道不通 郝萌曰太白失度留天潢為人

主憂以水為害若以井為害以入日占其國

太白犯咸池十二

黃帝曰太白入咸池中犯乘守之有喪 春秋緯曰太白入咸池天下亂易政人君惡之 石氏曰君死皆以入日占其國 甘氏曰太白入咸池有兵喪天子且以大敗失忠臣若旱一曰大水道不通貴人死以入日占國 石氏曰太白入天井大臣為亂國家易政令 郝萌曰太白入咸池中犯乘守之若糴貴一曰為有迷惑

人主者 荊州占曰太白中犯乘守咸池大兵起百萬
人以上

太白犯天街十三

郝萌曰太白當天街為諸侯自立為主一曰大水若留
止逆行其中為兵革起 荊州占曰太白守天街兵塞
道 文曜鉤曰太白犯守天街徘徊亂行主弱臣強道
路絕天下不通 荊州占曰太白不行天街為政令不
行不出其年有兵

太白犯甘氏外官三

太白犯狗星一

石氏曰太白守狗星守衛之臣作亂

太白犯狗國二

荊州占曰太白順行守狗國出兵討鮮卑烏丸逆守之其國為亂

太白犯天田三

郝萌曰太白提天田出入大水一曰五穀霜死

太白犯哭泣四

宋書天文志曰晉孝武太元四年十一月太白犯哭星
占曰天子有哭泣事九月癸未皇后王氏崩 孝武大
明三年十月太白犯哭泣後六宮多喪公主薨天子舉
哀歲大旱民飢

太白犯八魁五

荊州占曰太白守八魁兵大起

太白犯鉞鎖六

荊州占曰太白犯鉞鎖五日以上臣有謀主者 太白

犯鈇鑕誅執法之官 郝萌曰太白犯乘鈇鑕為鈇鑕
用一曰將有憂

太白犯葛藁七

黃帝曰太白入葛藁中主寶出憂臣在內

太白犯九州殊口八

荊州占曰太白守九州殊口九州兵起

太白犯天節九

荊州占曰太白守天節大將以兵出

太白犯軍井十

荊州占曰太白入軍井三日以上其歲大水

太白犯天狗十一

荊州占曰太白入天狗北夷大飢來歸隣國多土功

太白犯天紀十二

荊州占曰太白守天紀天下兵悉起

太白犯天廟十三

黃帝曰太白入天廟若守之為廟有事一曰為凶憂又

曰太白入守天廟有廟殘之事更不去死

太白犯巫咸外官四

太白犯長垣一

感精符曰太白入長垣三公九卿謀主兵大起天下亂
王者有憂

太白犯土司空二

荊州占曰太白出入土司空有大徭之事

太白犯鍵閉三

郝萌曰太白犯秉鍵閉星大臣有悞天子不尊事天者
致大災於宗廟天子崩一曰王者不宜出宮下殿有匿
兵於宗廟中者

太白犯天桴四

荊州占曰太白守天桴兵鼓起

太白犯天淵五

荊州占曰太白守天淵海水出江河決若海魚出

太白犯斧鑕六

郝萌曰太白中犯乘守斧鑕為斧鑕用一曰兵將有憂
黃帝曰太白入斧鑕為大臣用 荊州占曰太白犯
守斧鑕兵起 郝萌曰太白入斧鑕大將誅 荊州占
曰太白犯斧鑕誅執法之臣

太白犯天廐七

荊州占曰太白入天廐十日以上廐馬有食變 太白
守天廐為廩災之事人主以馬為憂不則馬疾 郝萌
曰太白守天廐三十日騎馬出

唐開元占經卷五十二

欽定四庫全書

唐開元占經卷五十三

唐 瞿曇悉達 撰

辰星占一

辰星名主一

郝萌曰辰星七名小武星天免安周細爽星能星鈎星
荊州占曰辰星一曰句星一曰鼎星一曰小霜一曰
音黃一曰歲咸吳龍 天官星占曰辰星北方之位黑

帝之子宰相之象一名安調一名細極一名能星一名

鈎星一名伺星辰主德常行四仲 張揖廣雅釋天篇曰

謂之繫星 鴻範五行傳曰辰星者北方水精也於五

常為智揚摧貪道於五事為聽不惑是非智虧聽失逆

冬令則辰星為變怪為水災為四時不和

班固天文志曰逆冬令傷

水氣則罰見辰星

淮南子曰北方水也其帝顓頊其佐玄冥

執權而治冬其神為辰星其獸玄武其音羽其日壬癸

荊州占曰辰星色太陰之精黑帝之子立冬主北維

其國燕趙於日壬癸其位卿相又曰人君之象天子執政主刑刑失者罰出辰星之易是也 合誠圖曰星主正常 巫咸曰辰星主調和陰陽節四時効其萬物辰星脩順之則喜逆之則怒 班固天文志曰辰星殺伐之氣鬪之象也 五行志曰辰星為蠻夷 荊州占曰辰星主內謀天下有急一時憂出 辰星主刑罰王者殺無辜好暴逆簡宗廟重徭役逆天時則辰星伏而不效主恩寬赦有罪輕徭役賦斂賑貧窮調陰陽和四

時則星效於四仲天下和平災害不生 荊州占曰辰星主刑獄法官及廷尉人君宰相之治重刑罰愐法令殺無罪戮不辜弃正法貨賂上流則辰星不效度不時節法官憂 荊州占曰有軍於野辰星為偏將之象無軍於野辰星為刑事之象 辰星主德燕趙代以北宰相之象 石氏讚曰辰星效四時和陰陽

辰星行度二

洪範五行傳曰辰星以上元甲子歲十一月甲子朔旦

冬至夜半甲子時與日月五星俱起牽牛前五度右行

迅疾常與日月相隨見於四仲以正四時歲一周天

案歷

法辰星夕見西方三十日而伏二十二日而晨見東方而伏伏入三十三日一千五百四十分日之一千一百六十八奇六十六復夕見西方如初一終凡一百一十五日一千一百七十八奇六十六星行度數亦如之是七十七年而二百四十九終也星平行日一度一年周天舊說皆云辰星效四仲以為謬矣

丞相

之象一歲一周出以四仲天下和平不出四仲災變生

人民大飢穀不榮陰陽錯亂國家傾冬溫夏寒害傷人

洛書曰春分二日辰星在奎晨見東方十八日而晨

入東方夏至二日辰星在井晨見東方十八日而晨入東方秋分二日辰星在氐昏出西方十九日而昏入西方冬至二日辰星在女昏出西方十九日而昏入西方

春秋緯曰辰星出四仲為初紀春分夕出夏至夕出秋分夕出冬至晨出其出常自辰戌入丑未淮南子

曰辰星正四時常以二月春分效奎婁效見也以五月

夏至效東井輿鬼以八月秋分效角亢以十一月冬至效斗牛出以辰戌入以丑未出二旬而復入晨候之東

方夕候之西方 石氏曰辰星仲春春分暮出奎胃東
五舍為齊仲夏夏至暮出東井與鬼柳東七舍為楚仲
秋秋分暮出角亢氐房東四舍為漢中仲冬冬至晨出
東方與尾箕斗牛俱出西方為中國 甘氏曰辰星是
正四時春分效婁夏至效輿鬼秋分效亢冬至效牽牛
其出東方也行星四舍為日四十八日其數二十日而
反入於東方其出西方也行星四舍四十八日其數
二十日而反入于西方 皇甫謐年厯曰辰星春分立

卯之月夕效於奎婁

宋均曰常以二月春分見婁

夏至立午之月夕

效於東井秋分立酉之月夕效於角亢

宋均曰見角亢

冬至

立子之月晨效於斗牛出以辰戌入以丑未

宋均曰二旬入晨候

之東夕候之西

其星將出必先陰風辰之情也

巫咸曰辰

星出四仲以正四時出孟天下大亂更王

班固天文志曰漢高之時

辰星出四孟後二年漢滅楚也

出四季彗星出有敗國一曰諸侯不

反命 尚書緯曰文政失於冬辰星不效其節 孝經

援神契曰辰星出仲德和柔 巫咸曰辰星出常不見

山海且有聚卒辰星受制則閉門閤無通客斷罰殺當
罪節關梁禁流徙 郝萌曰太白不出辰星獨出西方
兵起不戰辰星入兵罷 荊州占曰太白不出辰星獨
出東方天下有兵罷無兵有德令

辰星相王休囚死三

荊州占曰辰星之相也從立秋以至秋之盡其色即當
精明無芒角不搖光 辰星之王也從立冬以至冬之
盡其色則當比奎大星而青白有精光冬至之時有芒

角 辰星之休也從立春以至春之盡其色則當無精
光微小而蒼黃 辰星之囚也從立夏以至夏之盡其
色即當赤黑而不明 辰星之死也從仲夏以至夏之
盡及四季其色則當赤細小微不明又辰星之死也從
仲夏以至夏之盡及四季不行有囚色秋不下霜有死
色禾稼不成雷電不藏其留守也其國破亡其進舍也
與五星舍其下有殃其退舍也五星及之不可舉事用
兵 甘氏曰當其王也而有相色大臣專政令不行有

休色冬不冰有囚色冬無霜雪有死色冬有霧日不明
雷電行其留守也其國不祥其進舍也與五星合天下
有謀其退舍也五星及之不可舉事用兵 當其休也
而有王色是謂不祥人主獎臣下縱橫有相色將相君
臣不和有囚色夏不雨天旱有死色六月大疫傷貴人
有土功其留守也其國多小兒喪其進舍也五星合其
下有水災其退舍也五星及之不可舉事用兵 當其
囚也而有王色則夏雨雪霜蟄虫生雷電行有相色秋

有暴兵有休色流水湯湯有死色有暴獄大臣受殃其
進舍也與五星合有德令其退舍也五星及之其下之
國不可舉事用兵當其死也而有王色貴人疾疫有
相色臣下疾疫有休色庶人疫有囚色大旱其進舍也
與五星合其年不登政令重使者相望其退舍也五星
及之其下之國有兵不成

五星光色芒角四

甘氏曰候辰星以冬壬癸此王氣色當如其常色變則

失所也 荊州占曰辰星色比織女大星為正色青比
左角赤比參右肩黑比亢此辰星之常色也 禮斗威
儀曰居水而王辰星揚光 春秋緯曰辰星之効也其
色春青黃夏赤白若赤黃秋青白國有德令冬黃而不
明皆無傷也則變厥也其時不昌辰星當効而出色白
為旱黃為福又為五穀熟赤為兵黑為水青為疫 石
氏曰其國失刑失冬政則辰星易色 辰星在東方其
色赤中國勝其出西方而赤倍海國勝天下無兵於外

而赤則兵起 辰星其色黃而小出而易處天下之災
變而不義美矣 辰星之制也仲夏五月而出則當赤
黑色今反青黑其時多水晚出為筵星必有空國 巫
咸曰辰星四時皆變其色不出其年君以女憂亡一曰
以女樂亡 荊州占曰辰星正旗而出破軍殺將視旗
所指順而擊之大勝 石氏曰辰星芒角為毀則君蔽
期九年奸興三九二十七年亂不禁

辰星盈縮失行五

春秋緯曰辰星其時宜効而不効為失律天下有兵不出兵在外不戰 辰星三時不出兵甲大起四時不出天下更政 元命包曰刑失則簡宗廟廢祭祀故辰星不以時出當寒反溫四時錯政 春秋緯曰辰星失其時而出當寒反溫當溫反寒政反清濁同倫也 考靈曜曰政失於冬辰星不効其鄉 孝經鉤命曰失信則辰星縮天下大水歲不豐熟 石氏曰辰星當出而不出謂之擊卒伏而待兵大起豪傑發 甘氏曰辰星政

緩則不出急則不入非時則占 邦將大飢辰星出不
以時 巫咸曰辰星一時不出其時不和兵起二時不
出二時不和一曰名水大出三時不出三時不和兵甲
大起四時不出天下大飢有決水流殺人民一曰有孛
星出於東方 辰星春不見期百八十日大風發屋折
木秋不實不見婁長稼傷乃見彗星 辰星夏不見期
百六十日旱冬則不藏不見輿鬼中稼傷乃見月食
辰星秋不見期百八十日有兵不見亢樛稼傷 辰星

冬不見期百八十日陰雨六十日有流民夏則不長不見牽牛民大流辰星上出四孟天下亂一曰天下更王洪範五行傳曰辰星出孟易王之表也漢高三年辰星出四孟後二年漢滅楚也辰星一時而再見兵起其行右兵右行行左兵左行有兵兵罷一曰辰星一時再出色赤而角不出其年中而兵起辰星亂行流水湯湯兵革搶搶使之不殺治溝渠通水道如此則止辰星出天南大潦出北大旱海中占曰辰星出四孟

為月食出四季彗星 主好破壞名山壅塞大川通谷
名水則辰星不出歲大旱草木不長禽獸牛馬不蕃五
穀不滋民多病體癰疽 辰星逆行一舍以其時水出

京房對災異曰人君內無仁義外多華飾則辰星失
度不救必有逆主之謀其救也明刑慎罰審法心中無
縱功治城郭可以聘士來賢廣恩行惠則災消矣 荆
州占曰辰星出不待其時當水反旱當旱反水 辰星
不以時効者用刑罰不中 辰星一時不効其時不和

二時不効風雨不適三時不効水旱不調四時不効王者憂綱紀天下飢荒人民流亡去其鄉辰星不効四仲則春多苦雨夏多淒風當溫反寒當寒反溫陰陽不和五穀不成辰星出四季有破軍巫咸曰辰星出四季敗國荊州占曰辰星春不見期百日必有暴風疾雨而傷苗稼夏不見為旱飢期九十日有流民秋不見期六十日大水冬不見五穀不藏人民流亡四時俱不見河海決波仲女為妖彗見於二十八宿各以其

舍命其國 辰星縮天子失卒臣害作 辰星亂行甲
兵鏘鏘上見四孟改政易王見於四仲陰陽和五穀成
下見四季寇賊相望政失綱 辰星變色而逆其國殃
留守環繞不去其國大凶無道 水星一南一北害於
禾稷侯王有憂 辰星行諸列宿失道乘陽為水乘陰
為旱 石氏曰辰星出孟月天子尊師習兵有殺謀
郝萌曰辰星出西丁未間天下大旱赤地千里

辰星晝見經天六

石氏曰辰星晝見其國不亡則大亂 荊州占曰辰星經天凶

辰星變異生足大七

龍魚河圖曰天辰之氣主司災其精下為先農之神

巫咸曰辰星下為女子止於都津 石氏曰辰星之為

雲如曲流水災期四月 春秋緯曰辰星生足故主走

新主入 石氏曰辰星始出東方而大天下有兵 巫

咸曰辰星失其常賊人且昌社稷傾亡事行脩鼓革男

女更治事不治 荊州占曰辰星出東方白而大有兵
於外解色黃國有福五穀熟色赤旱為兵色黑為水青
為憂白喪 巫咸曰辰星小而失常主近無益之臣妾
內亂兵起 天官書曰辰星黃而小出而易處天下之文
變而不善矣 巫咸曰辰星小而動兵小起大動兵大
起 文曜鉤曰辰星小而色黃地大動 荊州占曰辰
星始出東方小而明天子有無益事 辰星小而色
黃當雨反旱當旱反雨

辰星流與列宿合鬬八

巫咸曰辰星流君臣倍有反事一曰流若明明信有事
石氏曰辰星流出天下有大水太子御史諸官多死
荊州占曰辰星與宿合東方臣伐主 巫咸曰辰星

與宿合若鬬西方期六月強國宮中有事 班固天文

志曰辰星與他星遇而鬬

晉灼曰妖星
彗孛之屬也

一曰五星天

下大亂出於房心間地動

辰星禳氣暈彗九

黃帝占曰辰星生氣而為黑穰明日大霧暮時大雨不出六十日所在宿獨大水 孝經內記曰辰星生氣而為黑穰者不出六十日牛馬羊皆貴三倍 荊州占曰辰星出穰氣一丈大水 孝經右秘曰辰星冠珥帝不明三月之中正陽減弱下力強陰制政反蔽陽佞人出世有兵 辰星冠珥王失土 巫咸曰辰星白暈邊有兵其失色兵其國凶 辰星白暈邊有水兵患三年乃止 邠萌曰辰星出彗東北不出三月兵聚其下

司馬彪天

文志曰光武建武三十年閏月甲午水在東井二十度
生白氣東南指焰長五尺為彗東北行至紫宮西藩工
白氣為喪有焰作彗所以除穢紫宮天子
之宮彗加其蕃除宮之象後三年光武崩

唐開元占經卷五十三

欽定四庫全書

唐開元占經卷五十四

唐 瞿曇悉達 撰

辰星占二

辰星犯東方七宿

辰星犯角一

黃帝占曰辰星出中道天下太平出陽道旱出陰道多
雨多陰謀乘左角為旱乘右角為水兵小戰 乘右角

將相若后家族有生法死者 近角合鬪女子為天下
害大臣殺主 留兩角間關梁不通軍有繫國庭邊境
不通 守角王者刑罰急國有帝者天下大亂又為水
災一曰多水災一曰五穀不成又曰大水滂滂民往來
舟船相望 守左右角黑為水赤為旱青為憂白為喪
守角中央為大臣憂

辰星犯亢二

辰星舍亢歲小水焦旱不至 辰星數入亢其國疫病

乘亢左星萬物不成五穀貴 乘右星為大兵有奇
令 乘若守亢左星為水乘右星為大兵為有擊者逆
乘滅右星為大人憂 守亢多盜賊兵並起人民相惡
逆行守亢為中央 入亢而犯守之名曰陰閉三光
大水滂滂無有立牆

辰星犯氐三

辰星入氐犯守貴臣暴憂法官有獄事 乘氐右星天
下有大水大兵天子有自將兵於野 守氐其下七日

有水守十八日有兵大起遠九十日 守氏多惡風天
下大旱穀不成天下大疫國易政 守氏為多水災

辰星犯房四

郝萌曰辰星入房三道為天子有子 入房十日成勾
已為天子忌之以赦解之 守房人民多暴死者又為
良馬出廄或有暴誅大臣相害垂天下道不通一日天
下水起不則有兵 守鈎鈐地裂若山崩 辰星犯守
房馬大貴若大赦 入守房心間地動 守房為人主

無下堂又曰東去而復還成勾已為后夫人有喪一日
為大飢人相食死者不葬又曰守南以水起兵 守房
為天下諸侯相謀慮道不通一曰天下易王大人喪有
反逆臣 逆行守房心天子被藥酒死一曰宮人食糟
糠 犯房穀大貴大飢犯若守房有白衣之會一曰為
天下相誅若犯左右驂大人中相誅 犯房奸臣有謀
辰星留逆犯守乘陵房左右驂若左右服皆為主崩
臣有謀陰所中將謀逆行乘陵中道天子失位而亡順

行乘陵中道天下和平 辰星犯乘鉤鈐大臣有悞天子不尊事天者致大災於宗廟王者不宜出宮下殿有謀匿於宮廟中者 犯鉤鈐王者憂 中犯乘陵房星者國君憂色青憂喪赤憂積尸成山黑有將相誅白芒角大哭

辰星犯心五

辰星犯天子王者絕嗣犯太子不得代犯庶子庶子不利 辰星經心清明烈照天下內奉明王帝必延年

合心玄色不明有喪 守心以水滅火三日不去主
服女藥大臣相戮山川大潰水溢滂滂一曰大人以外
兵死色黃增地色白有義於天下一曰陰侵於陽臣謀
其主又曰天下大敗易王一曰大臣弑主 逆行守房
心天子被藥酒死一曰宮人食糟糠 辰星中犯乘守
心明堂大人憂大臣當之在陽為燕在陰為胡期十月
遠三年 逆行犯心明堂環繞成勾已為大人憂期六
月若遠三年赦以解之 辰星中犯乘守心明堂皆為

內亂臣欲殺主有亡國近期十月中期一年遠期二十年又曰大臣當之 留逆犯守乘陵心星者宮內賊亂臣下有謀易王權在宗家及得勢大臣

辰星犯尾六

辰星入尾天下大水江河決溢魚鹽貴三倍 辰星入九江天下多水 守尾者為大人女君惡之 辰星守尾大飢人相食民異其國君子賣衣小人賣子妃后亂 守尾執政得事又曰以水起兵其年必成一曰疾病

守尾箕後宮有省者一曰後宮有罪廢者 守尾為用事者當之天下牢開大赦一曰天下大水萬物不成民多疾疫 留逆犯守乘陵尾皇后以珠玉簪珥惑天子者誣讒大起后相貴臣誅宮人出走兵起宮門

辰星犯箕七

辰星犯箕河水大溢若入箕中伺其出日而數之皆期三十日兵發伺始入處之率一日期十日軍罷 若入箕天下大赦一曰牢開一曰大人當之 守箕皆為其

歲水一曰皆為女主憂合筭用事者坐之 出筭穀大
貴天下大旱飢死過半 守筭中國有大兵執政者當
之若守之七日以內禍災起若有疾風解之守筭若角
動色黑貴者有棄損自殺死 守筭歲大旱多大災萬
物不成

唐開元占經卷五十四

欽定四庫全書

唐開元占經卷五十五

唐瞿曇悉達撰

辰星占三

辰星犯北方七宿

辰星犯南斗一

石氏曰辰星犯南斗為赦 巫咸曰辰星入南斗口中

大臣誅一曰不用衆而有天下 郝萌曰辰星入南斗

天下受爵祿期六十日若九十日 文曜鉤曰辰星之

南斗天下大水五穀傷人民飢 辰星居南斗河成間

道不通 黃帝占曰辰星守斗有兵赤而角天下敗白

而大裂地相賂為和黑而小其國亡 石氏曰辰星守

南斗在北民凍死在西虎狼多入邑在南狗多死在東

女子多死 劉向洪範傳曰辰星守南斗不可舉事用

兵必受其殃 甘氏曰辰星守南斗若角動色青黑萬

民大死橋梁不通天下水起 辰星失次守南斗所守

者誅 郝萌曰守南斗有兵易正朔 陳卓曰辰星守南斗萬物不成五穀傷 石氏曰辰星犯南斗留守之破軍殺將 司馬彪天文志曰辰星犯南斗有戮將若有死相

辰星犯牽牛二

郝萌曰辰星乘牽牛為人相弃於道 陳卓曰辰星乘牽牛穀貴天下大水 巫咸曰辰星守牽牛為五穀不成 感精符曰辰星守牽牛國以水為敗犧牲疫牛多

死 春秋緯曰辰星守牽牛牛先賤後貴 石氏曰辰星

守牽牛水涌為敗大牛多死 辰星守牽牛民有自賣

者歲多水災萬物不成五穀傷一曰地氣泄貴人多死

甘氏曰辰星守牽牛有犧牲之事若使人以四足虫

為虎來者色青有病色黑有死喪 海中占曰辰星守

牽牛歲多水民歸兵陵齊燕尤甚 郝萌曰辰星守牽

牛民人死喪一曰穀貴民多流亡 荊州占曰辰星守

牽牛關梁不通 陳卓曰辰星守牽牛臣謀其主 甘

氏曰辰星犯牽牛留守之為有破軍殺將 陳卓曰辰星犯守牽牛涌水出 北官候曰辰常以冬朝牽牛當朝不朝名曰失律二時不朝名曰失政三時不朝五穀不登 郝萌曰辰星急過牽牛一度過水一動二度過水二動三度過水三動四度過水四動五度過水小出六度過水大出地為之動

辰星犯須女三

黃帝占曰辰星守須女其國當有娶婦嫁女之事若他

國來貢女者一曰兵起大臣當之 石氏曰辰星守須
女為有女喪 巫咸曰辰星守須女為萬物不成 海
中占曰天下水雨無濟者至關東盡然 郝萌曰為后
夫人有變妾為主一曰為大水且至若守須女南其地
數被火守其北數被水 石氏曰辰星犯守須女女主
御世天下大赦其國驚水國大亂 荊州占曰天下多
寡女若子死繒帛貴 陳卓曰天下有雨災萬物不成
國飢民多疾 陳卓曰辰星逆行留犯守陵須女天子

及大臣有變必有奇政令

辰星犯虛四

洛書曰辰星犯虛大臣為謀主有兵起其國必敗 甘氏曰辰星犯虛其邦多水災 洛書曰辰星入虛有兵起 文曜鉤曰辰星躍入虛得所欲 巫咸曰辰星入虛中伺其出日而數之期二十日為兵發伺始入處之率一日期十日軍罷 郝萌曰辰星入虛為有德 春秋緯曰辰星之虛兵起大水出 郝萌曰辰星在虛東

春水虛南夏水虛西秋水虛北冬雷雨水 黃帝占曰
辰星守虛雨水常降流溢滂其國失綱人民流亡 石
氏曰辰星守虛國內亂一曰政急天下大亂天下虛大
人憂 甘氏曰辰星守虛若角動青色臣有欺君者有
兵有喪於國內 海中占曰辰星守虛有兵災丁壯行
徭妻子獨居萬室虛一曰春旱秋水五穀不成 郝萌
曰辰星守虛有武臣誅國必亡一曰中山水出人民無
所居從山而處災生日並見 荊州占曰辰星犯乘虛

若冬守其陽色赤黃旱萬物不成亂兵起

辰星犯危五

荊州占曰辰星犯入危奸臣謀主一曰天下大亂若賊臣起 巫咸曰辰星之危霖雨百日其國大水五穀不成人民飢 石氏曰辰星守危糴大貴天下起兵兵大發 辰星去危客水滅名宮若守危大水有大喪 甘氏曰辰星守危大臣有戮刑法官有憂一曰皇后憂病兵喪並起 海中占曰辰星守危天下兵大發 郝萌

曰其國破危一曰為大人蓋屋事若逆行守危其君簡祭祀 陳卓曰辰星犯守危國多水災 郝萌曰辰星守墳墓為人主有哭泣之事

辰星犯營室六

郝萌曰辰星犯營室為土功事犯陽陽有急犯陰陰有急 黃帝占曰辰星入營室天下兵乘水欲攻王侯之國不出百二十日 春秋圖曰辰星之營室天下徭役民不寧其處 甘氏曰辰星守營室其色青宮中女多

有死者大人憂一旬三月相近三旬五月國君死 巫
咸曰辰星守營室多水災五穀不成 郝萌曰徭役起
一曰后夫人憂有大喪一曰守營室東壁北關梁不通
又曰守營室為大人忌以赦令解之 玄冥曰辰星守
營室大兵乘船大水欲入侯王之國不出四十日 百
二十占曰天下諸侯發動於西北 聖洽符曰犯守營
室中女有天死者大人有土功之事

辰星犯東壁七

陳卓曰辰星犯東壁王者刑急法深朝廷憂愁國有蓋
藏保守之事 春秋圖曰辰星之東壁天下和平 石

氏曰守東壁國有大喪一曰大水又曰兵革起 郝萌

曰辰星守東壁為大人衛守一曰為天下兵起又曰秋
兵起亦云有土功事又曰為多水一曰歲晚水 春秋
圖曰辰星入東壁而守之奸臣有謀 玉厯曰逆行守
東壁大水出橋梁不通舟船用民大飢

唐開元占經卷五十五

欽定四庫全書

唐開元占經卷五十六

唐瞿曇悉達撰

辰星占四

辰星犯西方七宿

辰星犯奎一

石氏曰辰星入奎有決漏之事名水有絕海中占曰
辰星潤澤出奎有差令變色入奎有為令來者出奎有

為令出使者 春秋圖曰辰星之奎天下賤人出貴女
黃帝占曰辰星守奎奸臣賊子謀弑其主 河圖曰
有大水之災又曰大臣下獄 聖洽符曰有溝瀆之事
於國外 石氏曰外國之王入御中國一云天下多愁
一曰山水潰出 巫咸曰多火災為旱萬物不成有兵
災 郝萌曰有水事 荊州占曰王者憂之大人當之
辰星犯婁二

聖洽符曰辰星之婁其國任能賢人當用良才得達

甘氏曰辰星守婁若角動赤黑色臣有爭祿而起兵者
巫咸曰多火災 郝萌曰為白衣之會又曰外國之
主入御中國 天文志曰辰星守婁為兵為匿謀 郝
萌曰有兵兵罷無兵兵起 荊州占曰有兵犧牲多死
陳卓曰多水災萬物五穀不成 百二十占曰且有
水出 陳卓曰犯守婁刑罰劇急 洛書曰逆行守婁
歲有水若有蝗蟲犧牲多死萬物不成 甘氏曰辰星
入婁犯守之王者刑法急大臣當誅必有下獄者

辰星犯胃三

邠萌曰辰星犯胃天下穀無實以飢為憂一曰為亂

春秋圖曰辰星之胃布帛賤黃帝曰辰星守胃且有

兵令一曰國主當之黃帝曰有兵國以無義失獎又

曰大飢失政一曰有陰兵夷狄勝中國甘氏曰辰星

守胃若角動色赤白以水兵起無名而窮又曰有立侯

王若旱五穀不成巫咸曰辰星守胃多火災為旱萬

物不成有兵海中占曰民人大飢亂荊州占曰逆

行守胃天下有兵倉穀空虛 雌雄圖三光占云辰星
犯胃母子同死國立後王且有急令國主當之 陳卓
曰若犯守胃國主不寧 荊州占曰辰星守胃穀貴傷
火災

辰星犯昴四

石氏曰辰星犯乘昴且有亡國有謀主之變若行其北
西夷有毒霜早降歲有疾癘 荊州占曰辰星犯乘昴
夷狄之兵起為民害 郝萌曰辰星乘昴若出北者為

陰國有憂若北主死 郝萌曰入昂中有三丈之水五
穀不成大飢 春秋圖曰辰星之昂民且從之陵 石
氏曰辰星留二十日若六十日守昂中國開門有大客
國政大危易政令若自來之王 黃帝占曰辰星守昂
兵起破散民流亡 洛書曰大水決溢為民害傷五穀
石氏曰夷狄勝中國若五穀不成民大飢 甘氏曰
守昂若角動其謀者在北方大將之家外戚之親以星
入日占期 甘氏曰辰星守昂執法臣誅 郝萌曰天

下失網有兵一曰起中野又曰多水灾又曰守畢昂東
行至天高復反至五車為邊兵發有赦 感精符曰逆
行守昂有兵大臣有坐法死者一曰冤獄失理 荊州
占曰逆行守昂環繞兵起 郝萌曰犯若守昂為白衣
之會 雌雄圖三光占曰犯守昂夷狄之兵起國失政
一曰有陰兵 郝萌曰中犯乘守昂為兵北征

辰星犯畢五

黃帝占曰辰星犯畢出其北為陰國有憂出其南陽國

有憂 郝萌曰辰星犯畢若入之兵起於外狄有憂

荊州占曰犯乘畢邊兵起 巫咸曰入畢中各伺其出

日而數之期二十日為兵發伺始入處之率一日期十

日為軍罷 海中占曰入畢中有兵一曰歲熟 郝萌

曰有憂一曰其國易主 石氏曰出畢陽則旱出畢陰

則水為政令不行 春秋圖曰辰星之畢有大赦 黃

帝占曰辰星守畢山崩民流 聖洽符曰川河大盛民

多死亡 春秋圖曰子歸母天下安寧若有赦 巫咸

曰辰星守畢邊有以水起兵者 石氏曰山水潰河大
溢潦大至 甘氏曰辰星守畢民多疾病死亡 巫咸
曰有水災萬物不成 郝萌曰野人為亂 陳卓曰犯
附耳為兵起若將相有喪憂也不則免退 郝萌曰守
畢急謀兵期八十日若八月

辰星犯觜觿六

石氏曰辰星犯觜其國兵起天下動移 荊州占曰犯
乘觜憂水兵之災 郝萌曰入觜中伺其出日而數之

期二十日兵發伺始入處之率一日期十日軍罷石
氏曰守甯西方客動侵地欲為君王崇禮以制義則國
安 甘氏曰守甯子歸母君臣和同 巫咸曰為萬物
不成一曰旱五穀不成大人憂又曰不出百日天下大
飢 巫咸曰多火災 海中占曰守甯中有兵 郝萌
曰守甯萬物五穀不成一曰天子不可動衆行兵又曰
有反臣不出百日天下水趙國尤甚

辰星犯參七

甘氏曰辰星犯乘參貴臣黜 荊州占曰國有水兵

春秋圖曰之參兵大起 巫咸曰留止衡兵革起守參

貴臣黜 郝萌曰逆行若留止衡中為兵革起 黃帝

占曰辰星守伐星移南敵入塞星移北敵出塞 石氏

曰守參且有水兵一曰有反者國有憂 班固天文志

曰辰星與參出南方為旱若大臣誅 石氏曰守參天

子不可以將兵動衆國有反臣一曰有赦若出參中邊

有兵 巫咸曰水災萬物不成 海中占曰守伐衛尉

當之 郝萌曰守參若守伐為有反臣中兵一曰為后
夫人當之一曰內亂 春秋圖曰逆行守參邊將有憂
一曰外夷動 聖洽符曰入參犯守之不出其年有兵
起若拔邑先起兵者破亡後起兵者昌

唐開元占經卷五十六